

savo si kavka shukaripe? Kaka chhaya me zhi akana na dikhlyom la!
Me mangav la romnyake, ka prandinav late.”

I phuri vakerela:

– Akana, so te nagostinas kalke chavores?

I chhay pale:

– Ma pritesnine tut, mi day! Baba, papu! Me akana ka kerav, ka dav
les te hal i ka nashel peske.

Oy lela i tava, thovela shirlani, thovela po vast upral ki tava i vake-
rela:

– Panch angushte, panch machhe!

Chukka phenlyas i chhayori i ake – o machhe achhile habnaske.
Thovzhas anglal leste i o chavo lilyas te hal.

E komshiyes sare ahavde, kay o terno tsari mangela e chhaya rom-
nyake. Lena ekh rat, hulena andre ko kher, lena e phures, lena e phurya
ta e chhaya, phandena len. Phande len, daravde len. Lena lengiri
chhayendar ekha, thovena la ko kher, ama o tsari na zhanela kayka buti.

Prieminzhas la o tsarsko chhavo pash lende khere ko dvoretsi. Dobre,
ama samninel pes, vakerela peske korkori “Dali si oy, dali nanay oy!”

Lilyas la, phuterzhas lakoro muy i vakerela:

– Ya, thov i tava! Thov shirlani, thov to vast te dikav dali mozhe te
keres habe.

Dobre, ama i chhay lilyas te kerel habe, tharzhas po vast. Ov ahavzhas
soske nanay oy.

Ov nerverinzhas pes, lilyas te peninel pes:

– Akana, tu ka vakeres mange kate si i chhay, kate si o phuro, kate si
i phuri! Ako na vakerzhan mange, me tumen ka mudarav!

Astarela lakere daya, astarela lakere dades:

– Ya, na vakerzhan mange kate si i day, ola i chhay, ola o dad...
Tumare sheren ka lav akana!

I ola da nanay kate te zhan, mangena-na mangena, ola vakerde.

Dobre, ama i chhaya makhle la katrani, ama ov phenzharela e chaya,
soske ekh rat sine othe. Lela e chhaya, thovela, shuzharela la, kerela la.
Kerzhas baro biyav, sare e manushen pokaninzhas, li amen dazhe
kaninzhas. Li man kaninde, ya. Ama, me nakamlyom te zhav, beshlyom
mange khere.

